

## Dörfligeischer 1994

Hesch Mueh, oder schloofisch gar nid ii,  
De stellschte ds Schwizer Fernseh ii,  
U wottscht e Schloof mit Hochgenuss,  
Luegsch vorhär TV Super Plus,  
Gloubet üs Geischer, de geit's plötzlech schnäll,  
U die zwe si gfrässe vom RTL !

Sit Dir ou a der letschte Braderie gsi ?  
Als ächte Bieler isch me do derbi,  
De heit Dir sicher ou der Umzug gseh,  
Mit Trachte, Musig, und no viel meh,  
Und wenn guet gluegt hesch, ohni z' penne,  
Hesch sogar es Blüemli chönne erkenne !

Nach em populäre und volksnahe Ogi  
Isch das Johr Bundespresidant der Ötti,  
Es eifachs Amt hett är jo nit,  
Ou wenn's nöii und höheri Stüüre git,  
Üse Vorschlag wär no: e Dummheits-Stüür,  
Die chämti ömu de am Blocher z' tüür !

D' BKW u d' SBB, die gäh üs z' danke,  
Wüü die üs Bieler wei e Wöschhäcki schänke,  
Zmitts dür üsi Stadt wei si die länke,  
Derbi cha so höch jo niemer Wösch dra hänke,  
Dermit mir Bieler vor Wuet nid müesse choche,  
Tüet doch ändlech das Kabu im Bode verloche !

Was ratteret so langsam der Wüeschi entlang ?  
Isch's e Fiat mit Chlepfzündig im erschte Gang ?  
Oder isch's e Traktor, tüet üs verzeihe,  
Churz vor em usenander gheie,  
Nei, das wo hie doch tschäderet eso,  
Isch ds Bieler Renn-Solar-Outo !

Im letschte Summer hesch schier no  
Zwüsche Zeihe u Finger Schwümmhüüt übercho,  
I der Nässi seit ds Bethli zu ihrem Maa:  
"Leg d' Toucherbrülle u d' Flosse a,  
U nimm der Schnorchu, u mach chli schnäuer,  
U hol mer e Fläsche Wy usem Chäuer !"

De Franzose isch alles abverheit,  
Und ou d' Ängländer si usegheit,  
D' Schotte gheie mir sälber use,  
U scho cha die ganzi Schwiz beschtens pfuuse,  
U tröime, wie d' Nati, ruck-zuck-zack-zacke,  
Am WM-Final tuet d' Schwobe abehacke !

Oje, oje, ojemineh,  
Der EHC isch nienemeh,  
Mir hei e-n-Idee, dir chöit nüt verliere,  
Tüets doch mit eme nöie Presi probiere ,  
Süsch tuet nöchscht Johr am Ändi no,  
A'r Bande d' Uriella sto !

Ar Nöiufnahm vo der Faschingszunft  
Chunnt üsi Schmier ändlech zur Vernunft,  
Si verhafte zwöi, wo am spraye si,  
S' isch d' Walliser u der Scherrer gsi,  
Doch isch das schad, mir säge's ganz frei,  
Dass si di zwöi nid bhalte hei !